

*Wär aber der Sunntig in sich het,
 Dä bruucht kai Jaß und bruucht kai Bett,
 Bruucht kai Spaziergang z' mache;
 Er gseht am Himmel d'Sunne stoh,
 Trotz Räge-n-uff- und untergoh,
 Heert d'Aerde juble-n-und lache.*

Der Guggugg

*Wenn de 's erschtmol heersch dr Guggugg
 Und de hesch kai Gäld im Sagg,
 Blybt's by däm 's ganz Johr bikanntlig
 Und de gheersch zem Lumpepagg.*

*Afangs Mai isch's gsi und y bi
 Zottlet dur der Blieteschnee;
 Pletzlich fällt mer y der Guggugg
 Und i ha kai Portmonneh.*

*Und der Wald isch in der Neechi
 Und es huust e Guggugg drin;
 Doch so Sache kemme gwöhnlig
 Unserains als z'spot in Sinn.*

*Ganz verzwyflet lueg i um mi,
 Gseh vo mytem koh e Ma,
 Und i lauf em schnäll entgege,
 Grief en nätt und hau en a:*

*„Si, Si kemme grad wie gruntsche!
 „Speeter will i mi bidangge;
 „Aber lehne Si mer, bitti,
 „Fir e Viertelstund e Frangge!“*